



**JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL**

KONFERENSIA IMPRENSA

Dili, 06, Feveireu 2007

**TRIBUNAL HUSU DEPOIMENTUS PRIMEIRU MINISTRU TIMOR LESTE
AKTUAL RELASIONA HO KAZU FAHE KILAT
BA POPULASAUN SIVIL**

Tribunal Distrital Dili liu husi Juiz Kolektivu kontinua halao julgamentu iha Tribunal Rekursu atu rona depoimentus husi sasin sira ne'ebe husi defeza arguidu nian hato'o ba Tribunal. Julgamentu ne'e halao iha 06 Feveireu 2007. Julgamentu ne'e hahu iha tuku 09:34 otl. Tuir oráriu ne'ebe marka tiha ona, testemuñas sira ne'ebe tenke mai iha julgamentu ne'e iha sasin ema na'in 4. Sasin sira ne'e maka sasin primeiru Jose Ramos Horta (Primeiru Ministru Timor Leste Aktual), Mário dos Santos, Deonigio dos Santos no Bendito Freitas. Iha julgamentu produsaun provas ne'e Bendito Freitas maka la marka prezensa tanba tuir juiz presidente katak, Tribunal la konsege notifika sasin Bendito Freitas.

Husi testemuñas na'in tolu ne'ebe hato'o ninia depoimentus ba Tribunal iha Julgamentu ne'e só sasin Jose Ramos Horta maka koalia barak liu relasiona ho kazu fahe kilat ba Populasaun sivil iha Timor Leste.

Wainhira husu Ramos Horta ninia depoimentus konaba kazu kriminal fahe kilat ba populasaun sivil ne'ebe akuza ba arguidu Rogerio Tiago Lobato, sasin Ramos Horta ne'ebe agora dadaun kaer kargu hanesan Primeiru Minsitru Timor Leste nian, hato'o ninia depoimentus katak arguidu Lobato ne'e ema diak no ema ne'ebe iha dedikasaun boot atu bele dezenvolve nasaun ne'e. Nune'e, sasin Ramos Horta deklara sai katak imposibel arguidu Lobatao iha intensaun aat atu destroi ninia estadu tuir kazu ne'ebe akuza ba nia.

Alén ida ne'e, kuandu husi defeza husu konaba determinasaun iha *artigu 5 husi Lei No.8/2003 konaba Seguransa Interna* katak sidadaun ida-idak iha dever atu koopera ho ajentes foras no funsionarius seguransa nian, sasin Horta hataan katak tuir lei nia la hatene buat ida konaba asuntu ida ne'e.

Iha ninia depoimentus, sasin Ramos Horta dehan katak antes ne'e nia rasik la haree ou la rona katak arguidu Lobato komete aksaun ida ne'ebe kontra

Konstituisaun RDTL. Nia afirma katak nia nunka rona ou nunka haree katak arguidu Lobato iha iniativu hodi elimina ou hasai tiha lideres Opozisaun sira ho Petisionarius sira.

Sasin Ramos Horta deklara katak tuir data ne'ebe nia rasik la lembra ona sira halao reuniaun ida iha Eis-Primeiru Ministru Marii Alkatiri nia uma. Reuniaun ne'e marka prezensa husi konsellu seguransa Nasional nian. Assuntus ne'ebe koalia iha reuniaun ne'e konaba situasaun krizi ne'ebe Timor Leste enfrenta dadaun iha momentu ne'eba no koalia mos konaba ejizencias Petisionarius sira nian. Maibe la koalia konaba atu halo kapturasan ba petisionarius sira.

Tuir Sasin Ramos Horta katak iha loron 28 Mei 2006, maka Komandu Geral PNTL Paulo de Fátima Martins foin informa ba nia katak iha kilat lobuk ida posui ba PNTL ne'ebe URP sira uza iha Fronteira ne'e transfere tiha ona mai Dili. Maibe espesifikamente Paulo la esplika klaru konaba se' maka fo' orden no atu uza ba halo saida, no kilat sira ne'e tuir mai atu entrega bas e,etc.

Wainhira husu konaba Grupu Seguransa Sekreta ne'ebe deskonfia katak arguidu Lobato maka harii, sasin Ramos Horta deklara sai katak tuir ninia koñesimentu nunka iha diskoti ruma iha nivel governu hodi harii grupu sivil armadus atu fo' apoiu ba Polisi Nasional Timor Leste (PNTL). Tuir Sasin Ramos Horta, dalaruma ida ne'e hanesan iniativa husi arguidu Lobato nian tanba seguransa iha Dili iha momentu ne'eba la kontrola ona husi Polisia sira hanesan baibain tanba Polisia barak maka husik tiha eskuadra Polisia nian hodi halai sae ba foho atau bele proteje-an ou hamahan-an husi membru F-FDTL. Tanba antes ne'e iha ona konflitu entre instituisaun rua ne'e. Ne'e duni, haree ba kondisaun ou situasaun ne'e bele interpreta katak Lobato iha iniativa rasik atu bele fahe kilat ba populasaun sivil sira ne'ebe sei iha loialidade ba governu iha momentu ne'eba (Eis-FALINTIL).

Nia hateten tan katak insidente ne'ebe akontese iha loron 28 Abril 2006 iha Palácio Governo nia oin ne'e akontese tanba iha intervensaun husi terseira parte. Maibe sasin Ramos Horta la klarifika konaba parte terseira ne'ebe maka halo intervensaun ba iha akontesimentu ne'e. No to'o agora parte governu nian sei kontinua esforsu maksimu nafatin atu bele identifika ema sira ne'e atu ida-idak bele responsabiliza sira nia aksaun kriminal ne'e iha Tribunal nia oin .

JSMP apresia prezensa Primeiru Ministru , Jose Ramos Horta ne'ebe hiit-an mai iha Tribunal nia oin atu bele hato'o ninia depoimentus. Espera katak elementus sosiedade hotu-hotu, liu-liu ba lideres sira atu bele kontinua koopera ho parte tribunal nian atu nune'e prosesu julgamentu ba kazu fahe kilat ba populasaun sivil sira ne'ebe involve arguidu Rogerio Lobato bele lao ho diak no susesu.

ATU HETAN TAN INFORMASAUN KONABA NE'E BELE KONTAKTU HO:

Maria de Vasconcelos

Acting Director, JSMP

Telephone: 332 3883

Email: vasconcelosmerry@yahoo.com